



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikasu Imprensa
31 Setembru 2023

Xefe suku Nipane agradese tebes ba JSMP tanba kontinua hakbiit estrutura suku hodi transmite informasaun ba membru comunidade sira seluk

Iha 26 too 29 Setembru 2023, JSMP fasilita treinamentu ba treinadór ka *Training of Trainers (TOT)* ho tema lideransa transformativu iha suku Nipane, Postu Administrativu Pante-Makasar, Regiaun Administrativu Espesiál Oekusi Ambeno (RAEOA).

Matéria ba treinamentu loron 4 ne'e kompostu husi matéria kona-ba violénsia bazeia ba jéneru (VBJ), tráfico umanu, lideransa transformativa no mós metodolojia oinsa bele trasmite informasaun ba ema seluk.

Objetivu husi treinamentu ida ne'e mak atu hasa'e koñesimentu lideransa suku sira (xefe suku, xefe aldeia sira, delegadu/a, joventude no membru defisiénsia) suku Nipane kona-ba matéria igualdade jéneru, violénsia bazeia ba jéneru, tráfico umanu no prevensaun no responde ba vítima kazu VBJ no trafiku umanu. Alende ne'e, fó treinamentu kona-ba lideransa trasformativu atu lideransa sira tenke iha karáker no iha komitmentu atu halo transformasaun iha sira-nia comunidade no mós oinsa bele transmite informasaun ne'ebé hetan iha treinamentu ne'e ba iha membru comunidade sira seluk.

Espera katak treinamentu loron haat ne'ebé JSMP fasilita ne'e bele fornese informasaun ne'ebé natoon ba partisipante sira iha Suku Nipane ba matéria relevante no sira mós bele fahe tutan tan informasaun sira ne'e ba membru comunidade sira seluk ho efetivu no eficiente. Nune'e, comunidade sira, liuliu sira iha área fronteira bele prepara an ho di'ak hodi prevene no kombate krime VBJ no tráfico umanu iha futuro, dehan Diretora Ezekutiva JSMP, Sra. Ana Paula Marçal.

Iha sesaun apresentasaun matéria kona-ba VBJ no tráfico umanu, partisipante sira hato'o sira nia preokupasaun sira relasiona ho eduka oan sira ho maneira baku, menór ka labarik no ema ho kondisaun moras mentál sira prátika krime, labrik sira idade ki'ik hola malu (forma uma kain), laen sira ho kondisaun lanu mak baku fen, sidadaun Indonézia mak lori fetu mai explora iha Timor-Leste no halai fila ba nia rai.

Entertantu iha sesaun apresentasaun matéria lideransa transformativu, partisipante sira hato'o sira nia preokupasaun kona-ba lideransa suku ne'ebé lai karaterística atu hadi'a valór kulturál no sosiál ne'ebé ladi'ak ne'e iha lei ruma bele kondena ka lae?

Hatan ba preokupasaun sira ne'e, JSMP esplika katak lei la tolera kualkér aktu krime, inklui hanorin oan sira ho maneira baku ka forma seluk ne'ebé ofende sira nia fíziku ka psicolójiku. Nune'e, inan-aman ne'ebé hanorin oan sira ho violénsia ne'e sei ba hatan iha tribunál.

Kestaun kona-ba menór sira ne'ebé prátika krime, tuir Lei Penál, sira iha inimputabilidade, ne'ebé signifika katak sira la bele responsabiliza ba sira nia hahalok tanba lei konsidera sira seidauk iha kapasidade atu sukat sira nia hahalok ne'e no la hatene kansekuénsia saida mak sei mosu husi sira nia hahalok ne'e. Tanba ne'e, bainhira sira prátika krime, prosesu la'ó to'ó iha tribunál maibé desizaun tribunál nia sei tau sira iha fatin rehabilitasaun atu eduka sira bele muda sira nia hahalok no mentalidade iha futuru. Sira nia hahalok ne'e mós labele tula ba ina-aman, familia ka ema seluk tanba lei dehan responsabilidade kriminál ne'e tula ba ema ne'ebé halo.

Kestaun kona-ba labarik ki'ik mak hola malu (harii uma kain), JSMP esplika katak tuir Lei Sivil, feto no mane ida ne'ebé atu hola malu tenke iha idade tinan 17 ba leten, iha konsentimentu husi ema na'in rua ne'e ninian no laiha relasaun familia besik (too grau tolu) liña kolateral. Lei Sivil mós hateten katak labarik tinan 16 ne'ebé hakarak harii uma kain tenke iha konkordánsia husi nia inan-aman. Mezmu nune'e, iha Lei Penál kriminaliza aktu seksuál adolescente katak labarik tinan 14 to'ó tinan 16 prátika aktu seksuál relevante tanba abuzu nia inexperiénsia sei hetan kastigu tinan 5 prisaun.

Kestaun kona-ba sidadaun Indonézia ne'ebé mai prátika krime explorasaun seksuál iha Timor-Leste no halai fali ba nia rain, JSMP hatan katak tuir lei se de'it mak prátika krime iha teritóriu Nasionál Timor-Leste tenke prosea tuir lei Timor-Leste nian. Maibé ba kestaun hanesan sidadaun ne'e halai fali ba nia rain, iha prátika susar tebes atu ita ba lori nia mai responsabiliza nia hahalok refere tanba ita nia estadu seidauk iha akordu estaradisaun ruma ho Indonézia atu haruka fila nia sidadaun ne'e atu mai hatan ba nia hahalok ne'e no fiar katak iha futuru estadu sei halo akordu estradisaun ho Indonézia atu fasilita prosesu sira hanesan ne'e.

Entertantu kona-ba lideransa suku ne'ebé laiha karáter ka kapasidade no interese atu hadi'a valór kulturál no sosiál ne'ebé ladi'ak, JSMP hatan katak kompeténsia iha comunidade nia liman tanba poder xefe suku ka xefe aldeia sira ne'e comunidade suku mak fó, se comunidade haree katak lideransa suku laiha interese atu muda ka hadi'a valór kulturál ka sosiál ne'ebé ladi'ak, iha elisaun tuir mai comunidade bele hili fali ema seluk ne'ebé hakarak halo transformasaun.

Iha sesaun apresentasaun matéria tráfico umanu, xefe juventude suku Nipane fahe mós nia esperiénsia kona-ba sai vítima ba krime tráfico umanu iha tinan 2007. Nia haktuir katak iha tinan 2007 nia hetan bosok husi ema estranjeiru (Indonesia) ba halo serbisu iha província Kalimantan-Indonesia. Iha altura ne'ebá sidadaun Indonézia ne'e ba bosok xefe juventude ne'e no lori ba serbisu iha Kalimantan ho saláriu boot, katak kada loran selu osan Rp 80.000. Iha realidade, bainhira to'ó iha Kalimantan, komesa serbisu nu'udar traballadór fábrica no to'ó fulan atu simu osan, kompañia selu de'it ho osan Rp 20.000 kada loran. Nune'e, xefe juventude ne'e sente triste no laran moras maibé nia pasiénsia no simu de'it ona osan refere tanba iha ema nia rai. Xefe juventude ne'e dehan katak mezmu ho osan ki'ik, maibé nia halibur osan uituan-uituan no iha tinan 2010 nia consege selu aviaun fila mai Timor-Leste.

Hafoin simu treinamentu ne'e, xefe juventude ne'e hatene ona katak hahalok sira bosok ema lori ba fatin seluk hodi halo serbisu no selu la tuir akordu ne'e krime nune'e ba futuru nia sei evita no sei transmite informasaun sira ne'e ba nia familia, kolega no komunidadade sira atu evita.

Partisipantes sira ne'ebé partisipa iha treinamentu ne'e hamutuk ema nain 22 ne'ebé kompostu husi feto 12 no mane 10. Partisipantes sira ne'e mai husi xefe suku, OPS, xefe aldeia sira, delegadu/a, juventude sira no membru defisiénsia nain rua husi suku Nipane.

Treinamentu ne'e realiza husi JSMP ho apoiu finanseiru husi Governu Timor-Leste, liuhusi orsamentu Ministériu Interiór ne'ebé jere husi ajénsia Nasoens Unidas UN Women.

Atu hetan informasaun liután favór kontaktu

Sra. Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>